

बारह भावना

(अनित्य भावना)

राजा राणा छत्रपति, हाथिन के असवार।
मरना सबको एक दिन, अपनी-अपनी बार॥ 1॥

(अशरण भावना)

दल-बल देवी-देवता, मात-पिता-परिवार।
मरती-बिरिया जीव को, कोई न राखनहार॥ 2॥

(संसार भावना)

दाम-बिना निर्धन दुःखी, तृष्णावश धनवान।
कहूँ न सुख संसार में, सब जग देख्यो छान॥ 3॥

(एकत्व भावना)

आप अकेला अवतरे, मरे अकेला होय।
यों कबहूँ इस जीव को, साथी-सगा न कोय॥ 4॥

(अन्यत्व भावना)

जहाँ देह अपनी नहीं, तहाँ न अपना कोय।
घर-संपत्ति पर प्रगट ये, पर हैं परिजन लोय॥ 5॥

(अशुचि भावना)

दिपे चाम-चादर-मढ़ी, हाड़-पींजरा देह।
भीतर या-सम जगत् में, और नहीं धिन-गेह॥ 6॥

(आस्रव भावना)

मोह-नींद के जोर, जगवासी घूमें सदा।
कर्म-चोर चहुँ-ओर, सरवस लूटें सुध नहीं॥ 7 ॥

(संवर भावना)

सतगुरु देय जगाय, मोह-नींद जब उपशमे।
तब कछु बने उपाय, कर्म-चोर आवत रुकें॥ 8 ॥

(निर्जरा भावना)

ज्ञान-दीप तप-तेल भर, घर शोधें भ्रम-छोर।
या-विध बिन निकसे नहीं, पैठे पूरब-चोर॥ 8 ॥
पंच-महाव्रत संचरण, समिति पंच-परकार।
प्रबल पंच-इन्द्रिय-विजय, धार निर्जरा सार॥ 9 ॥

(लोक भावना)

चौदह राजु उत्तंग नभ, लोक-पुरुष-संठान।
तामें जीव अनादि तें, भरमत हैं बिन-ज्ञान॥ 10 ॥

(बोधिदुर्लभ भावना)

धन-कन-कंचन राजसुख, सबहि सुलभकर जान।
दुर्लभ है संसार में, एक जथारथ-ज्ञान॥ 11 ॥

(धर्म भावना)

जाँचे सुर-तरु देय सुख, चिंतत चिंतारैन।
बिन जाँचे बिन चिंतये, धर्म सकल-सुख देन॥ 12 ॥

इति बारह भावना

